

四庫全書

集部



欽定四庫全書

集部

清風亭稿卷一至三

詳校官庶吉士

臣陳若霖

中書

臣

劉源溥覆勘

覆校官中書

臣

汪師曾

校對官中書

臣

嵇承志

謄錄監生

臣

熊夢祖

謄錄舉人

臣

張元功



欽定四庫全書

集部六

清風亭稿

別集類五

明

提要

臣等謹案清風亭稿八卷明童軒撰軒字子昂鄱陽人家於南京景泰辛未進士官至吏部尚書此集第一卷為騷賦第二卷至八卷皆詩其門人李澄所編後有魏驥楊守陳沈周諸人題詞其詩雅淡絕俗而在明代不以



詩名殆正德以後北地信陽之說盛行寥寥  
清音不諧俗尚故歟朱彞尊明詩綜僅錄其  
憶金陵五言律詩一首未盡所長又引周吉  
父之言稱其九日詩黃菊酒香人病後白蘋  
風冷鴈來初草堂詩草堂夜雨生科斗花逕  
春風叫栗留兩聯亦非其至或彞尊偶未見  
其全集亦未可知也軒又別有枕肱集今未  
之見其存佚蓋莫之詳矣乾隆四十二年六



月恭校上

總纂官臣紀昀臣陸錫熊臣孫士毅

總校官臣陸費墀



--	--	--	--	--	--	--	--



欽定四庫全書

清風亭稿卷一

明 童軒 撰

四言古詩

望雲思親卷為史侍御賦

白雲悠悠在天之陬陟彼岵兮我心則憂 白雲靡靡  
在天之隅陟彼屺兮我心則思 我思伊何父母孔者  
匪無萊衣莫克娛之匪無寸祿遠莫持之 王事靡盬  
不遑寧處瞻望白雲親舍其下

叶後五反

親舍其下室遠心



邇願言思之泣涕如雨

味道齋為秀才程愈賦

道之旨大羹玄醴君子味之渾然斯理 道之腴熊掌  
及魚君子味之淵乎其微 於皇天命一誠不已文王  
大聖不顯於已 聖也希天賢其希聖動靜或愆為道之  
病 君子味之是謂自持朝斯夕斯道豈遠而

玉泉

并叙

玉泉美隱者之德也樟山隱者童國光貞潔



不污故別號玉泉以自況  
番陽童軒為賦玉泉四章

樟山何有有玉有泉亦白其色亦澄其蘤  
溫溫君子既潔且貞撓之弗濁磨而不磷人亦有言儒為席珍

德既方止亦既章止圭瓚黃流庶幾將止  
維此懿德

不息則久惜曰未試亦既爾有苟或不臧  
勉不愧負

房九

反抵鵲是棄濯足自取

此考反

尚慎旃哉俾遺爾後

蘭室為會稽陳德誠賦



蘭室喻交友也

蘭之香兮維葉茂茂藝彼居室可采而嗅 蘭之香兮

維葉莫莫

末白反

藝彼居室可佩而懌

蘭之香兮維葉

萋萋彼其之子薄言有之匪直薰德同心友之 瞻彼

日月悠悠其逾我德未化我友是資迨今弗力悔也可

追

騷體

松泉辭一首送陶厚歸金川隱居

代周守敬作



西風驚秋紛落葉於晴川感物叙之易變念游子而未  
還胡擾擾以迷形役徒俯仰於百年繫鄉關之安在懷  
舊隱於松泉爾其命駕晨征僕夫在門望青山兮千里  
愁芳草兮吟魂遡輕風兮舟颺澹斜日兮江雲睇遙遙  
以前路心予予而懸旌倏家林之在目儼桑梓之猶存  
於是杖策來歸柴荆啟扉僮僕嘻嘻稚子牽衣歎誤罹  
於塵網迫衰朽而何之幸松泉以無恙期投老而支離  
若乃有綠盈庭有酒新醲或席陰以箕踞或臨流而賦



詩已矣乎富貴非吾願功名不可期慕赤松而長往締  
泉石以為知浩歌白雲鄉徘徊芳草涯胡為乎榮辱之  
相繆逐羶腴於末路釣聲利於頽流塗實迷而未遠事  
既往而奚尤懷古人而不可見傷病俗之難瘳招白雲  
以怡悅請息交以絕游匪懷珍以為潔憇突梯而吾羞  
侶空山之猿鶴脫塵溷之蜉蝣念田園之未蕪顧琴瑟  
之尚留聊優游以卒歲時偃仰以消憂為逸民於斯世  
樂夫天命復何求



秋風辭思松雲陶先生作

秋風蕭蕭兮鴈南歸草木搖落兮夕露沾衣明月皎皎  
兮照我帷蟋蟀在壁兮吟聲悲蹇予山中之人兮猿狖  
與居悵獨處此兮情莫能娛懷佳人兮路修阻而莫隨  
涉川無梁兮登山無車歲冉冉其逾邁兮曷云能來叶  
回念昔者之歡會兮今焉別離愛而不見兮使我躊躇  
湘靈鼓瑟辭

若有人兮江之中竹蕭蕭兮水溶溶鷓鴣啼兮欲雨猿



猶嘯兮生風翩靈旗兮來下雲和作兮三終望九疑兮  
煙濛濛聲泠泠兮意何窮渺翠華兮何許獨江上兮青  
峰

擬愁陽春賦

東風來歸見碧草之萋迷渺風光兮千里蕩春情兮愁  
予飄揚兮遊絲鮮新兮芳枝何燕鷺之差池覲睨以相  
逐兮似亦媚此晴暉漢之曲兮湘之南

叶

佩蘭茝兮

采蘅蘼水粼粼以東注日晶晶而西馳繫盛年之難再



乃一感於佳期望夫君兮天一涯川無梁兮陸無車心  
搖搖兮欲醉首矯矯兮重回我思君兮君不知年衰颯  
兮路崎嶇目飛花兮如送拾芳草兮若遺陽春兮予不  
知其為歡樂兮為傷悲安得生彼雙翼而奮飛兮凌風  
遠墮於君懷

思美人賦

有美一人兮在天之陬恒悵望而鬱紆兮曷云能休路  
阻絕而予莫覲兮心煩寃而語疇願寄聲於豐隆兮恨



寥廓而無由羌蹇修以重媒兮恩初志之或繆念兩情  
於夙昔兮締束素而好逑何讒人之溷濁兮致無辜而  
見尤弗參驗以閱實兮肆謗讟之橫流遠遷謫於江鄉  
今日憔悴而無聊叶傷舊會之莫續兮亂愁緒而難  
抽螻螳紛其見制兮鴟鴞厲而與仇志沈菀而不揚兮  
思蹇產而無道願一見以有明兮徒仰視夫天高叶  
羌葑菲之陋質兮曾何美之可侑彼衆舌之簧鼓兮迺  
誕幻而為譁紛總總之得志兮率追曲以是求吾獨連



蹇而不偶兮實吾命之不猶芳與澤之雜揉兮信十年  
之有猶慨圓鑿而方枘兮宜乎鉏鋸而難投惟進迫之  
無地兮蹇獨立於道周知變易之不可為兮聊浮泳於  
方舟擘夫容於鶯渚兮采蘅若於江洲持芳華而無與  
娛兮肆躑躅而增憂情怲怲以自失兮涕浪浪而難收  
遂升高而望遠兮冀彷彿而邁之見浮雲之上征兮儵  
變態而苦迷獨僵徊而不進兮策羸駟之班如顧途窮  
而日暮兮竟侘傺而忘歸睇林崗之叢薄兮爛盈盈其



華滋玩芳條之可擷兮又焉得夫同車嗟流光之飄忽  
兮老冉冉之將至也指白日以矢予心兮敢竒襄之或  
貳也欲懷沙以自赴兮恐余誠之弗識也惟忠貞以固  
守兮庶前修之可企也

戒舟辭

舟經龍游幾為灘水所覆因  
為戒舟辭一首聊以自警云

維水兮漫漫維石兮團團湫流兮驚湍舟行兮苦難膠  
予楫兮上下捩予舵兮迴盤奔長年兮號舵師脫性命  
兮斯須念垂堂兮有戒幸去險兮即夷



空山辭

定邊道中作

我我兮山青片片兮雲生慘踈烟兮古道澹斜日兮邊  
城邊城兮多山崎嶇兮行難枳花兮秋晚槲葉兮風寒  
饑損兮號林絡緯兮淒吟憶鄉關兮何處重回首兮傷  
心



清風亭稿卷一



欽定四庫全書

清風亭稿卷二

明 童軒 撰

樂府歌行

艾而張

維網有綱載張其目設彼中林以羅以罟

叶伏

蕞爾燕雀

亦既來止莫黑匪鳥亦既離止有鳥有鳥其名曰凰其  
儀煌煌文明之祥周旋以適九仞其翼于觀于遊而不  
來集張而獲之我心則懌



行路難

行路難太行九折何盤盤  
枯藤老樹掛絕壁攬衣欲上  
愁攀援行路難瞿塘三峽激  
流湍舟行咫尺苦難進宛  
如生度蛟龍關山之高水之險  
不似人心千萬變人心  
危峻不可窺眼前突兀峰九疑  
人心險詐不可測平地  
波瀾起千尺當年握手出肺肝  
詎料相逢不相識春風  
昨日五侯門秋雨今朝廷尉宅  
君不見春申舍人有李  
園棘門之禍誠何冤又不見田  
文車馬三千客五百姓



名書怨牒行路難危於山險於水不獨悠悠世上兒骨  
肉相看亦如此行路之難難莫比

君馬黃

君馬黃我馬白共拂巾車朝禁闕一朝君馬生光輝渭  
橋金市馳如飛翠絲作轡玉為勒芻豢盈筐秋正肥吁  
嗟我馬徒神骨緩轡周行思前浚西風一夜凍霜華殿  
上空餘乾苜蓿

將進酒



將進酒君莫辭請君聽我歌新詞百年三萬六千日一  
歲歡娛能幾時君不見古人名利相奔趨蘭亭梓澤皆  
邱墟何如秦宮花下醉滿堂明月紅氍毹榮辱信有命  
富貴亦有期一朝光寵還自至何須讀盡人間書黃金  
注白玉鍾綠醅初潑蒲萄濃貂裘不惜酒家換便當醉  
卧埋春風盛時一去不再返綠鬢明朝成老翁將進酒  
括莫空雲臺烟閣我何有仰天大笑浮雲東

關山月



關山月揚清光塞上征人望故鄉故鄉千里音塵絕幾  
回見月傷離別枕戈夜卧草頭霜彎弓晨走林間雪愁  
雲茫茫塞草寒月輪斜掛白狼山一聲羌笛淒風急多  
少征人念未還

明妃怨

萬里黃雲塞草枯琵琶無語月明孤玉關回望將軍寨  
錦帳氍毹夜博盧

結客少年場



惡少事游俠結交屠販兒輕身重然諾掉臂無不為看  
花夜宿平康里鬪雞朝入咸陽市樗蒲一擲百萬錢不  
數赤丸私夜語豈不聞荆卿高歌易水寒西入函關不  
復還又不聞聶政持戈刺韓國剗腸皮面輕生決古來  
大俠無代無紫陽鐵筆誅賊徒丈夫一死貴合義何必  
虛將青史污

竹枝辭

八首

家住東吳白石磯門前春水浣羅衣朝來繫著木蘭棹



閑看鴛鴦作隊飛

石頭城外是江灘  
灘上行舟候潮難  
潮信有時還  
又至郎舟一去幾時還

油壁尋芳拂翠蛾  
春衫半臂試輕羅  
海棠花嬌香不露  
遮莫狂蜂蛺蝶多

勸郎切莫上巫峰  
勸郎切莫往臨邛  
臨邛少婦解留客  
巫山峰高雲雨濃

山桃花開紅更紅  
朝朝愁雨又愁風  
花開花謝難相見



春色無邊愁殺儂

蜀江西來一帶長江水無波鏡面光長恨人心不如水  
等閑好惡最難量

西湖荷葉翠盈盈露重風多蕩漾輕荷葉團團比儂意  
露珠不定似郎情

勸郎水底莫鋪綿勸郎石上莫栽蓮水底鋪綿綿易爛  
石上栽蓮根不堅

春夜詞



金鴨香消午夜天粉牆西畔控鞦韆  
茶蘼夢怯春寒峭起傍雕闌看月圓

楊白花

楊白花風吹無定止一夜春波化綠萍  
飄逐行舟千萬里行舟去去西復東  
却嘆相逢更何許水無極萍無蹤  
連臂歌殘愁更濃

采蓮曲

采蓮朝下湖西曲短袂輕綃鬪粧束  
小紅艇子駕雙橈



盪破鄰鄰鏡光綠荷葉荷花颺錦雲鴛鴦兩兩護波紋  
荷錢却喜似儂鈿藕絲還愛似儂裙湖頭昨夜西風雨  
沙嘴新添三尺水翠倒紅翻相向愁波心半露青蓮子  
采蓮復采蓮回船正迎浪不惡歸去遲只嫌明月上明  
月團團湖水秋清光滿面照儂羞郎家只隔湖南垞咫  
尺橫波日夜流

麗情曲

海棠雨歇春夜長  
曉轡驚夢飛鴛鴦  
玉肌苦怯東風急



帳冷流蕪熏繡裳起來窺鏡倦梳洗玄雲滿犀飛不起  
玉麟金爵翠翹新似與春光鬪明媚花床曉霧香濛濛  
春困泥人星眼朦簾鉤鸚鵡隔窻語怪殺東君深淺紅  
試呼小翠卷朱箔一雙黃蝶花間落

自君之出矣

二首

自君之出矣愁倚月明中思君如木葉黃瘦怯西風  
自君之出矣慵整玉搔頭思君如隻鴈孤影下南樓

春曉曲



妖紅軟綠含朝陽  
鸚吟燕語愁人腸  
苔痕漬露翡翠濕  
杏花撲雪臘脂香  
鳳衫輕薄春寒冽  
斜倚銀屏怨離別  
葉砧一去歸未歸  
屈指東風又三月

猛虎行

長林白日暮淒風  
起山城猛虎初負嵎  
猙獰誰敢撓  
狐狸左右竄  
父子逐逐行磨牙  
若張戟掉尾如樹旌  
虎行不可近  
虎怒能啞人吁嗟  
馮婦慎勿輕古今  
誰是裴將軍



去婦詞

刺促何刺促出門不敢分明哭憶初癡小嫁君時自謂  
生死常相隨誰知中道生乖阻棄妾紅顏不如土弓鞋  
窄小荊棘多掩淚行尋舊時路浮雲上天歸有時君心  
一失那能回糟糠不忘如再好重磨荆釵與偕老

拜月詞

拜月下高堂滿身風露涼曲闌人語靜銀鴨自焚香昨  
宵拜月月似鐮今宵拜月月始弦直須拜得月輪滿應



與嫦娥得相見嫦娥孤恁妾亦孤桂花涼影墮冰壺年  
年空習羽衣曲不省三郎再遇無

惜花行

官舍有五色薔薇一株每歲四月其花盛開  
因賦長詩一章以資清賞

桃花非紅李非白宦遊見此真奇色天機製出雲錦裳  
燦爛文章鬪奇絕年年花發正薰風不與桃李爭妖穠  
高處旋添蛾子綠低叢輕拆鶴翎紅紫檀和眉飛香霧



金粉團星貼雲母上枝下枝參差開不用花奴催羯鼓  
花正開人正少把酒看花惜花好底須鈴索護芳菲但  
願花時風雨少此花已為人愛惜綵檻移春憶當日有  
花有酒即為樂莫待花飛空太息花飛飄泊不足憐人  
生安得長少年君不見洛陽歌舞地黃昏鳥雀棲荒煙

燕歌行贈徐七遵誨

次唐人  
高適韻

黑雲黯黯陰山北跨馬長征殺胡賊腰間寶劍懸吳鉤  
寒光閃爍青蓮色一從仗劍出蕭關幾載風塵瀕洞間



鐵甲戰酣青海月羽書飛捷白狼山論功自合分茅土  
猶向軍前朝沐雨可憐白首困窮荒虎帳何人日歌舞  
滿地腥風血色旆輪臺萬里居人稀胡兒吹笛朝出塞  
壯士橫戈夜突圍從戎却念辭家久數竒尚落他人後  
一聲寒角秋風鳴望鄉幾度頻搔首男兒離別何足嘆  
才器如君世稀有閩外會有推轂時肘後黃金印如斗  
玉門胡騎去紛紛更上燕然勒大勲君不見匈奴多繫  
頸至今猶說衛將軍



再和燕歌行

黃榆白葦連塞北眼底穹廬皆虜賊屯空殺氣連雲飛  
壯士相看失顏色元戎奉詔玉門關錦帳牙旗壘陣間  
獨把一麾專節鉞儔能三箭定天山單于生長樂邊土  
繞帳牛羊牧秋雨閑中聚唱涼州詞醉後起為胡旋舞  
魚龍川頭古樹腓紇千山前飛鳥稀紫髯胡兒眼雙碧  
大腹匈奴腰十圍徐君遠戍邊庭久况復東海簪纓後  
伐敵能諳虎豹韜次功應位麒麟首憤時氣節人不知



唾手功名今未有秋清長劍倚南天夜半孤城臨北斗  
莫言白眼衆紛紛佇看高垂竹帛勲君不見鄼侯知國  
士登壇終拜大將軍

再和燕歌行

撓槍夜射飛狐北虞騎千羣來寇賊驚沙莽黃入天  
笳鼓連營慘秋色大將排營列漢闕雕戈畫戟指揮間  
旆搖大棘城邊月箭滿祁連雨後山戍卒年深皆著土  
慣識軍情耐風雨誓酬報國慷慨心肯學當筵渾脫舞



八月清霜百草腓  
殷檉幾樹暮鴉稀  
南山射虎風鳴鏑  
大澤呼鷹雪打圍  
桓桓驍勇從戎久  
競取功名惟恐後  
橫槊長歌孟德詩  
請纓生繫賢王首  
交河大小百戰餘  
鐵券丹書尚何有  
牙旗虎影凍翻風  
匣劍虹光夜衝斗  
被堅執銳亂紛紛  
咆哮橫行策異勲  
君不見田單能用  
命援桴一鼓奮三軍

驄馬行一首送朱文輝之江西僉憲

驄馬來自渥洼水  
夾鏡懸晴竹披耳  
一朝天子賜近臣



人馬輝光照閭里南畿門外太平隄駿尾蕭稍日夕馳  
春衣五色綵雲麗秋斧一片寒冰輝有時乘向長安市  
九陌人人行且避嘶風驕噴玉花高弄影晴翻碧蹄碎  
除書昨日來烏府明朝又上西江路六月清霜向日飛  
一瓢甘雨隨車布使君年纔三十餘琅琅聲價高璫璵  
澄清久攬范滂轡諫議曾傳張湛書羨君此行宜及早  
西江黎庶須君好祖筵撾鼓送行旌一鞭曉出都門道  
都門草色青如蔥馬行蹴踏搖玲瓏驄兮本是麒麟匹



歸來應置天閑中

柳枝詞

千絲萬縷畫樓前  
搖曳東風舞翠烟  
試問長年能送客  
何如繫住別離船

步虛詞

霧閣深深客到稀  
閑花繡滿碧苔衣  
幾回奏罷瑤臺簡  
控得金虬月下歸

倉首謠



太倉有粟崇如京太倉羣鼠穴為營羣鼠穴倉得所憑  
舊穀既沒新穀升大者如狐小者豚累累白晝兼人行  
羣翻聚嚙巧鬪聲狸奴坐視不敢驚君不見三秋無雨  
禾稻枯遑遑菜色愁田夫倉中有粟官不發縣吏打門  
猶索租老羸旦夕且溝壑羣鼠飽食人所無於虐羣鼠  
汝勿喜會有張湯來磔汝

斷腸曲

效元體  
二首

五陵游俠少年子春風日日長安市錦韜鶴轡青驂騮



蛇弓羽箭千金裘尋花折柳章臺路園紅疊翠誇豪富  
歸來醉卧流蕪幃醉中猶記朝雲詞青樓只道春光好  
蘭窓雨打梨花老

右  
蕩

江頭浪白烟如織行舟一去無消息去年有書在洛中  
今年書到上臨邛蘭缸昨夜生金粟今日長安問龜卜  
出門不識東與西遊絲落絮隨風迷

右  
商

五雜組

三首

五雜組蜀錦裳往復還江上航不得已為文章



五雜組鸞鳳衾往復還水中禽不得已思山林  
五雜組刺繡巾往復還道上人不得已傷麒麟

巫山高

巫山高高望不極疊嶽連崖倚天碧雲裏夫容十二峰  
宛如神女晚粧濃襄王已去今千載行雨行雲尚有蹤  
朝朝暮暮荒臺下

叶後  
五反

幾見行人時駐馬

叶巫  
古反

玉佩仙

香杳不聞空有神巫奏歌舞路入楓林樹色青古祠飛  
雨亂苔生相思何處愁魂斷木葉蕭蕭猿夜聲



出塞曲 二首

吹角出轅門軍中寂不諠  
塞鴻驚陣起胡騎隔河屯  
箭劈秋雲黑旗搖落日昏  
腰間雙劍在猶未報君恩

出得皋蘭北愁雲一望賒  
野狐啼古堠燐火照寒沙  
鐵甲披風冷牙旗卷雨斜  
單于猶未滅戰士莫思家

日出東南隅

日出東南隅照我陌上桑  
離離露葉小採摘未盈筐  
蠶饑正伺食持斧伐遠揚  
使君五馬來躊躇臨路傍  
妾夫



侍中郎執戟趨明光妾非淇上女豈比邯鄲娼願君回  
五馬毋為徒自傷

烏夜啼

庭前老樹烏夜啼少婦起聽驚且疑霜飛滿瓦澹月白  
樹葉蕭蕭巢影危烏啼啞啞聲未已再三聽來心且喜  
少婦啟窻紗叮嚀向烏語汝烏啼有赦人言不虛美願  
汝烏棲勿飛去一歲常生八九子更與爾巢護風雨

春江花月夜



夜月懸金鑑春流颺錦帆江花如有意飛點繡羅衫

芳樹曲

旭日轉洪鈞園林萬樹新畫屏朝弄色綵檻夜移春野  
逕俱堪望鄰家盡不貧獨憐寒谷底黃葉尚疑塵

劉生

少年學武兼學文姓名不屬羽林軍殺人睚眦不敢視  
橫行抱劍遊三秦關雞擊筑時將暮馬蹄慣踏章臺路  
一朝官裏賜銅符百戰捐身寧復顧平生挽弓能挽強



區區郭解何足當願為豫讓報恩死不學李陵嬰恥亡  
長安有狹邪

長安有狹邪徑微捷於矢白馬兩貴游鳴珂耀金紫為  
問過者誰云是許與史日晚讌高堂華筵盛羅綺嬖奴  
舞巴渝美人歌北里列座促飛觴笙竽沸人耳平明甲  
第開趨者衆若市炙手手可熱庇身身可庇孰知東牆  
生游心天地始秋雨響疎桐蕭然閉門睡

折楊柳



細雨染鵝黃絲絲拂水長  
游人出門去惆悵惜春光  
纔看葉鬪眉又見花飛雪  
只恐秋風生長條不堪折

車遙遙

征夫將早適起拂車上霜  
澹月殘星白遙思路正長  
驅車出門遠少婦腸空斷  
不見車上人但聆鐸聲轉  
鐸聲去悠悠聞道成涼州  
不識涼州路空懷萬里愁  
愁來不能禦魂逐車輪去  
願作石尤風吹折車前樹

野田黃雀行



嘖嘖野田雀羣飛隨處饒時來晚禾裏啄啄爭肥磽窮  
老逼官租終歲常苦號如何相聚食不間夕與朝山長  
少彈射地僻多蓬蒿飛飛信得所寧知農事勞

江南曲

桃花斑斑落紅雨玉缸春酒濃如乳吳姬白紵裁舞衣  
一曲嬌歌少年子江頭日晚停商舶衆中金多為上客  
當壚一斗沽十千引滿紅螺吸明月杯空月落江水寒  
勸君且宿茱萸灣遲明大艚掛帆去千里烟波傷玉顏



結襪子

大梁公子信陵君貴介豈比諸侯卿平生折節能下士  
夷門屠市俱成名信陵一去今千載開閣平津竟虛待  
士風愈下俗愈偷望履呈身何足怪寵絡紛紛難具陳  
私恩桃李滿門春周公吐哺不可見吁嗟結襪今何人  
門有車馬客

門有車馬客駕言來故里念子久不歸契闊近一紀主  
人延客坐悲泣不得語移時叙寒暄始復相爾汝借問



邦族間親知今有幾一一聽客言大非疇昔比壯者死  
行役老者半為鬼前年困征徭十戶九凍餒去年坐買  
辦往往鬻妻子上司急誅求鞭撻不少止貪吏寡仁怨  
腹削至腦髓言罷各掩泣張燈具雞黍觴行三四酌深  
竹映寒雨平明客登途愁緒誰為理

風木悲烏二操為李景暘侍御作

惟木兮在阿淒風兮孔多風無寧日兮木無寧柯念兒  
有身兮乃父母之枝兒思終養兮父不待兒顧瞻斯木



兮兒心則悲

右風  
木操

惟烏兮在屋月黑兮風淒以促啞啞哺母兮報母之育  
顧兒有身兮實母之雛兒思返哺兮兒母已殂豈兒有

心兮曾不如烏

右悲  
鳥操

古意 二首

君好桃李姿妾好松栢老桃李搖春風飄零委芳草不  
如松栢枝青青長自好

君好紫螺杯妾好青鸞鏡螺杯泛香醪飲之亂人性不



如鏡生光可以照欽正

長安道

長安在何許定鼎燕薊北周道千里平商邑四方極金  
臺玉壘何雄哉重關設險從天來黃道祥光直南見紫  
微中宮正北開天連閣道星辰拱日射觚稜金碧聳百  
尺文樓五鳳飛九重魏闕雙龍擁長樂鍾聲曙色寒千  
官劍履集朝端龍函捧勅頒三殿象輦駝琛響八鑾皇  
家制度超前古文物聲名播寰宇白雉遙聞貢越裳龍



媒又見來西土太平治道軼唐虞彬彬多士皆文儒揚  
雄已奏甘泉賦司馬還陳封禪書葱龍王氣浮丹宸承  
露金莖矗雲起紫禁彤墀月似銀玉河金水花如綺九  
陌香塵拂面飛鳴珂初散午門西王侯第宅施行馬公  
子園亭爭鬪雞王侯公子多如雨大道青樓聯戚里玉  
笙吹月鳳雙飛繡幙圍春鶯並語雕鞍寶蓋日過從片  
言出口生華風始見金張初賜第俄聞衛霍又旌功六  
街三市相連絡佛舍飛甍絢丹雘百貨都歸大內東人



才盡入平津閣御史臺前烏欲啼將軍營裏馬頻嘶教  
坊夜月人如玉上苑春風錦作畦風光節物年年在萬  
世河山長不改罷官廷尉自書門遷仕中丞彌映彩莫  
言李廣不封侯誰惜馮唐易白頭青史功名今已矣江  
湖高起見京樓

飲馬長城窟行

飲馬長城窟寒泉咽不流髑髏腥枕雨刀斗冷鳴秋瀚  
海烽烟斷陰山部落稠將軍方閱武醉擁紫貂裘



明妃引

陰風烈烈吹黃沙  
稽落山下愁雲賒  
明妃馬上面如玉  
萬里去適單于家  
玉關漸遠人烟絕  
回首漢宮唯見月  
琵琶掩恨去路長  
塞鴈叫寒天欲雪  
天欲雪狐兔愁殷  
檉蕭蕭古塞秋  
願將一掬思鄉淚  
寄與黃河東去流  
君不見古來戰士長  
城死白骨累累多  
似蟻妾身雖辱亦  
不辭忍使徒兒為  
輿尸

采菱曲



十五誰家女新粧照水明采菱不愁暮入浦月初生兩  
槳搖月明風吹浪花起驚起雙鴛鴦飛過野塘水

禽言四首

阿哥阿嫂兄弟而今俱已老斗粟從來尚可舂慎勿聞  
牆競此小阿哥阿嫂

苦苦苦苦避却蒼鷹逢乳虎年年剝削無了期那得官  
中生卓魯苦苦苦苦

養蠶忙阿姑攜筥婦采桑蠶老作繭姑勿喜官絹正輸



三丈強養蠶忙

急急眊號寒啼饑難過活賣田且了今年租辛苦來年  
只傭作急急眊



清風亭稿卷二



欽定四庫全書

清風亭稿卷三

明 童軒 撰

五言古詩

感寓

景泰乙亥秋八月予家居無聊乃稽往事述  
舊聞因而勉賦五言古詩六十八首謾錄於  
此云

幽居念無極乃在天地先兩儀既肇位寒暑互推遷庖



機鑿理窟馬畫斯播宣三才本一貫孰能窺其玄

天雞夜半鳴火輪出扶桑遲遲麗曲阿萬國皆明昌聖  
人法天運峻德四表光赫然萬物覩化曜舒以長出作  
而入息泰運成虞唐何知負暄者亦欲獻吾皇

蒼旻示縣象晝夜恒推移三台各分位列宿光陸離高  
高紫微垣中有天之樞輔弼暨丞衛旋繞如聯珠長杠  
揭華蓋太乙層階梯乃知至德主垂拱天下歸

四序迭更謝日夕無停機人生覆載內造化詎能違達



人重義命愚者昧是非靈臺誘外物孰知察危微勉旃  
力鞭策賢聖乃同歸

吾聞邃古世土鼓而蕢桴黃帝垂衣裳晝夢游華胥唐  
虞紹至理文德乃誕敷夏忠商尚質隨俗變隆污姬周  
日文盛國風詠騶虞奈何五霸習秦豆趨木涂

雞鳴海色動羣類各有趨猿猱解升木蜣螂知轉珠物  
性率自然不假命與提人生靈萬物理一分則殊賦形  
肖天地仁義本良知云胡日戕賊冥然居下汙



瀛海環神州其谷澤無底迤沓八紘外不知幾萬里川  
輸而不盈尾泄亦何已陽侯鼓洪濤怒立百丈水試問  
王方平揚塵特虛語

周穆御八駿漢武求三山所欲在長生豈憚道里艱瑤  
池觴白雲金盤屑神丹刀圭卒難遇龍去不復還千秋  
陵寢樹落日悲風酸

明王慎大德四夷乃咸賓夏璜肅慎矢方物以類陳所  
需在器用犬馬何足珍於焉昭德致孰敢不來臣



丹山出異鳥文采光陸離高飛薄霄漢虞網巧空施昔  
當有虞氏此鳥曾來儀一鳴協韶樂千載應昌期回觀  
百鳥羣喧啾竟何為

青蠅乃微物營營止於榛偶遭騏驎尾託之千里騰沾  
污變白黑攻鑽掠羶腥嗟爾亦何得胡為人所憎

孤桐發清商飛泉繞纖指一彈秋月明再彈天似洗琅  
琅太古音不入箏笛耳安得鍾子期相逢奏流水

宋人粥繚繞一朝貿奇資晉人貯垂棘韞櫝十載餘技



輕信易售器重識者稀所以呂尚父白首漁磻溪姬文  
苟不遇卒老甘布衣

采采芙蓉花江長浩烟霧縷彼同心人方舟不成渡歸  
來坐前軒月白澹清露永懷弗能緩鳴璫渺何處

衆人恣懽謔志士恒苦憂所憂非一端不為衣食謀吳  
忠襄鳴革楚直沉湘流區區不識察心膂成仇讐長城  
乃自壞千載將誰尤

貧賤不可去所願甘布衣先民有格言富貴履危機高



車豈不好一覆信難支君看廟中犧孰與濠上魚賢哉  
鹿門叟去去從此辭

崇蘭褱蕭艾薰猶本自殊妖穠世所尚馨香獨何為時  
無纓佩者青青遺路岐殷勤理蕪穢勿為塵所欺

干將出塵桺光奪寒泉流平鋪白鷗帶疑是蒼龍鉤神  
物古所異有氣冲斗牛雌雄忽失偶空為時世羞誰能  
獻天子請入上方收依然炫鋒鏑斷彼佞臣頭

乘黃本龍種上孕房日精何當馭造父一日千里程騰



驟逐電流駭躍躡雲輕駑駘信非匹歟敢爭能胡為  
置立仗而不使一鳴俛身駕長輅垂首絡繁纓良才

關二用字

空慙神駿名

迢迢弱水西中有三神山石洞閟日月芝草生琅玕龍  
耕玉田水鶴啄松雲壇仙人羨門徒日夕居其間烟霞  
組長袖刀圭駐紅顏我昔從之游飛珮鳴珊珊竭來住  
人世矯首隔塵寰安得大鵬鳥飛來載我還

松柏有孤性冰霜恒自嘉天天桃李顏爭為兒女誇物



情既云爾志士復何嗟北宮有遺菽東陵無故瓜斯人  
不可見目極飛鴻賒

南國有佳人顏色白如玉天寒被短褐奚羨綺與縠居  
貧諒自持豈云乏膏沐素節誰能儔西山有孤竹

蟪蛄矜小智結網掛高楹微蟲亦蠢爾冥飛入其罾居  
然取而食蟠腹縣晚晴有蜂忽相觸急趨欲有營螫尾  
肆厥毒醜物俄斃形嗟哉機變者飽食安可恒

出門瞻太華危峰拄天際宣尼去日遠巍然徒仰止大



道日淪湮攻鑽弊諸子獨抱萬古心感嘆何時已

衆人嗜奔競宛若風中花朝開燦珠玉暮落隨泥沙所以古達士知命匪所誇寧甘伏櫪馬恥學粘壁蝸魯連今已矣撫卷徒興嗟

艷色天下重不以今古殊明妃傾國容如何嫁單于有貌不足恃有才當自愚士衡遭殺戮元禮成羈縲君看冥冥鴻人生反不如

三策出江都一語取丞相命途有通塞絲粟不可強嗤彼



操瑟徒枘鑿竟何往身辱名亦虧豈但尋尺枉陋哉投  
閣雲美新空附莽

披裘詣中野拾薪以行吟孰云季子賢顧謂取遺金天  
地物有主妄攫誠何心焉知肱篋者掉臂方駸駸

食客世恒有義士天下稀田光報太子杵臼存孤兒英  
聲振今古名與金石俱彼有廊廟器佩玉飄長裾國難  
僅一髮縮首思全軀吁嗟長樂老遺臭將誰欺

軌方信難適輪圓始能行儉人醜正直端士羞逢迎是



非得失間將焉用吾情寧為齒剛敝勿為柔舌榮

曲沃產縣匏汶陽發孤莖參差製雙翼吹作鸞鳳聲悠  
悠楚妃歎切切荆王吟空慚濫食者亦有南郭生

驅車欲何適駕言陟高岡陰雲垂四野獵獵北風涼豺  
狼嗥我後烏鵲噪我旁岩谷少居人我行多所傷念此  
不能往匪云途路長悠悠歲華暮佇立空彷徨

明月射虛牖寒蟬悲洞房感之不能寐起步徒自傷美  
人隔千里欲涉川無梁徘徊弔孤影涕下沾衣裳



朝適易水湄鷸蚌方怒爭今日復明日漁者得并擒齊  
楚擅敵國干戈日相尋寧知兵火敝坐使嬴氏并

秦人據崤函自謂萬世基孰知楚一炬百二俱成灰惟  
彼陶唐氏有此冀北陸勢無金作城利乏湯為池黎民  
悉於變垂拱成雍熙乃知帝監德豈在險與夷

步出北郭門風悲白楊樹纍纍古今墳高下正相似中  
有百年人長眠不知曙荒烟孤兔遊落日樵牧語疾黎  
秋著花一望迥無際感彼雍門琴淒然淚如注



欽定四庫全書

卷三

相如賦大人曼語誇獨步飄飄氣凌雲時復中規度雖  
云諷意深適足誨淫助不見霧縠奇乃是女工蠹

富貴親戚懼貧賤父子離骨肉尚如此何況他人為季  
子昔未遇憔悴面目犁一朝佩相印革車千乘隨揣摩  
發雄辨抵掌驚愚癡還過洛陽境父母為道除蛇行伏  
妻嫂局促一何卑季子不足道薄俗堪長吁

昔云遺壽考稽謀無自天如何鮐背者徒抱犬馬年賈  
生洛陽少叔度漢室賢高風灑六合古今無間言



荆山產奇璞不惜屢獻之苟懷刑足憂至寶橫路岐何  
如南陽卧謳吟梁父餘終然致三顧可使大名垂

清流有時濁白石不可爛雖膺推轂名未免吹竽濫門  
前桃李榮籠中桂芝滿苟有為國人相知寧恨晚

千金結知己自謂兩不疑詡詡氣相下握手肝膽披奈  
何黃金盡一朝生別離潛謀發機檻反眼相傾危朝歡  
莫仇敵狀類犬豕為安得金石心千載永不移

平路不生廷療智久清滄東管以代楹奚免風雨敗知



人古所難進退各以類謂予如未信請觀易否泰

相馬必以輿相士必以居容取失子羽言取失宰予聖  
人察所安尚蔽驪黃餘况彼肉眼夫乃欲評錨銖麟植  
巧外飾狗瓦同兒戲寄言姑布徒奚以骨相為

積毀解消骨積羽能折輪魯參固仁者而豈能殺人流  
言三及之投杼慈母嗔所以南陽老長為梁甫呻

金玉瑩奇質不為礱鑄渝君子抱仁義豈彼貧賤移夫  
何陳蔡間於窮亦殆而削然反琴歌通塞不復知由安



潁陽樂共適丘首頤古今同一揆萬世真吾師

彼姝者誰子云是南國娃幽閑不踰節自幼本良家娥眉妬新月玉貌羞春花一朝入楚宮容色絕世誇終焉鄭袖忌劓鼻空成嗟

老狐戴髑髏夜拜北斗神綏綏曳長尾頃刻化為人怪異固莫測妖術方日新高城竅深窟蟠結無與倫望之不能灌憂憤填秋旻

神龍本陽精變化升天池噓雲澤下土在在蘇羣黎一



朝天帝怒下謫荒山陸鱗甲悉瘡疥螻蟻紛制之過亢  
信有悔聖易豈汝欺何當復飛躍鈞天日遨嬉

為政莫若猛有德斯以寬火烈望之畏水弱民玩焉寧  
知一念慈流禍不可旋桂符盜羣起盡刈猶草菅猛寬  
貴相濟至哉宣父言

鴻荒世已遠王霸分二途學術有誠偽治迹殊隆污王  
道曠如天蕩蕩不可模霸圖塞罅漏反掌成驩虞吁嗟  
四三芋請視狙公狙



斤鷄飛蓬蒿晝夜聲唧唧大鵬運天末鼓簸垂雲翼小大  
固不同賦性各有適夫何含齒徒終歲不遑恤田毛責  
地征庸調苦徭役安得蕭與曹民心庶寧一

誠能格異類信可孚豚魚昭然布方冊斯理不我誣宏  
農虎東渡潮陽鱷南驅潁川鳳來集騶邑蝗不飛斯民  
實人類而豈物不如頑貪信可變愧無韓鄧俱

珠藏川發媚玉韞山生輝君子抱奇器厥聞乃四馳奈  
何鄭人樸云是鼠腊為名存實則病百世空成嗤



蛇足不可添虎尾竟難履弄巧本無成逢危貴知止陳  
蕃死北臺晁錯斬東市黃泉如有知冤魂共誰語

有客遺瓠種樹之南山隅秋風結佳實呼然成巨壺剖  
之以為瓢獲落無所需誰將慮大樽逍遙浮江湖物固  
各有用在子宜有圖

養志必忘形重義乃輕利為問賢者誰曾子昔居衛正  
冠絕塵纓捉衿露雙臂曳屣一高歌商聲滿天地

人心匪可測頃刻忽千變明敦玉帛好中實慘刀劍彎



弓思愈已發墨構深怨高山猶可登浚泉猶可見厚貌  
飾虛情古今庶為鑒

衆貪必惡廉衆曲斯惡直邪正有兩途是非起勦敵遜  
菴偽學名溫國黨碑立世事每如此不見奇耦畫

異端亂人耳譬彼淫哇同聖人不復起龔俗何由聰如  
何六籍後紛紛費研攻孰知千載下見此紫陽翁擠排  
振其落敷陽發其蒙斯文天未喪尚幸斯人功

坎蛙不知海甕雞難語天區區章句儒妄意斯道傳訓



詬竟穿鑿末技空雕鐫寧知方寸內萬化本一原桓讀  
乃糟粕信哉輪扁言

海外更九州中有道名國男女恒裸形衣裳笑襜褕此  
事信不經貸之乃異俗堂堂華夏域禮教匪不足偷詐  
肆相欺而寧知恥辱漿酒與藿肉日飽牛馬腹視彼謹  
厚夫羣嗤衆爭逐賈生倘可作此亦堪痛哭

鴛鴦產冀北十五以為羣秋風飽芻豆簇簇如雲屯中  
有八尺姿天矯同遊麟饑食玉山禾渴飲瑤池津路遠



不易得終歲恒苦辛盜跖曝人肝金玉如烟塵顏回一瓢飲難免陋巷貧斯理自古來仁人胡歎哉

蜉蝣衣楚楚生死隨朝昏蟪蛄吟夏樹秋委落葉根人生亦祇爾鬢髮忽素莖何如秘元命囊括經世文葆真鍊精魄龍虎相吐吞黃芽變仙骨永與天地存底須謝塵世遠赴滄洲雲

任公垂大釣投竿東海湄期年不能得蹲坐苦不辭倏然牽牓餌有魚吞食之驚揚奮髻鬣水擊風霆馳引手



試一掣腊肉如山陂嗤彼趨瀆者綸影飄游絲時時雖  
有得瑣瑣皆蝦蟇得魚尚云爾經世奚能為

旄頭射長空塞馬南下牧封疆失固守老稚遭殺戮隴  
上掠牛羊天陰聞鬼哭豈無當世雄可比衛與霍長驅  
十萬師橫行淨沙漠

梓人職繩墨鑿削器不居一朝構棟宇羣役環嚮之斧  
斤視規畫刀鋸聞指揮逾時大厦成名姓乃上書始知  
君相任所職在無為講求經國要綜理元化機百工苟



無曠庶績乃咸熙功成天下賀周召與同歸

殺青示鑒戒善惡存始終孰知馬遷筆益長澆漓風論  
道敝黃老叙事尊奸雄深譏貧賤恥虛美貨利宗厲階  
由此始歷世將無同安得起孫盛筆削昭至公

予既作感寓詩覽者率以出韻為言余惟孫  
恂唐韻大抵為近體而作非所以施於古詩  
者也古詩如十九首及漢魏諸名家之作或  
二三韻或上下韻俱不嫌於並押是有考於



三百篇之體也近代吳才老作韻補亦以江陽真庚諸韻相通豈不以古今之詩不同而古今之韻亦不同與且唐之詩人杜甫最號大家律詩中玉山草堂一首亦用真文二韻其古詩三四韻者如童關吏彭衙春陵義鵠行之類尚多有之余故不可以不辯也時景泰乙亥冬十月上浣日軒識

擬古



有園莫種桃有地須種竹桃樹搖春風嫣然媚紅綠豈  
無一時好終隨車馬足何如青竹枝歲晚在幽谷節直  
心亦虛冰霜立寒玉

答項司廳文祥

為別歲云莫相見良未繇聞君抱新恙使我增離憂悲  
風鳴四野雨雪正颼颼如何山陰道亦有訪戴舟閑居  
訝空谷寂寞誰與投卧聽雲中鶴禽鳥有匹儔知音古  
昔少俟焉何所求思君不能寐起坐彈吳鉤安得徃從



之握手懽相酬冷然挹清論庶幾無悔尤

樵樂生

舉世汨聲利君若了不關孰知天性真乃在樵斧間秋  
晴微雨歇黃葉漫空山長歌入幽谷無營心自閒朝俱  
白雲往暮隨飛鳥還怡然得至樂俯仰真無慚富貴蟻  
穴夢功名蝸角歎何如一束薪去取諒非難劃然動長  
嘯六合清風寒

詠蘭



汎汎崇蘭安托根  
雲水涯光風一披拂  
綠葉何蔥蒨  
君子采而佩  
馨香竟無比  
羞彼春芳榮  
嫣然媚紅紫

琴軒為同鄉聶典史題

退食自遯幕  
鳥下吏人散  
綠槐初霽雨  
高軒正蕭爽  
焚香理吾琴  
襟抱絕塵埃  
淒淒鸞鶴吟  
颯颯松風響  
春隴雉登木  
曉日牛鳴盍  
孤臣抱幽怨  
壯士歌慨慷  
冷然會深趣  
千古心獨往  
師涓不復作  
雅調竟誰賞  
願為南風詩  
排雲獻天上



廣陵舟中贈張叔勉

二月發官道江水深且幽問言欲何往述職朝帝州東  
風生蘋末時雨忽已收古驛出高岸嘉樹臨芳洲張君  
平生友雋雅孰與儔推蓬時適我握手仍相留談笑雜  
諧譁氣味欣且投感茲會晤意孰云離別愁君才豈凡  
近力學追前脩沉淵匿神物伏櫪淹驂騑青雲諒非遠  
白首寧足憂而我迂鄙質與世恒仇尤東臺偶承乏竊  
祿良可羞遙遙川路長去去移輕舟斜日照孤渡蒼烟



飛白鷗明日淮陰酒擬換囊中裘

和陶彭澤歸田園居 三首

歸來寡人事被褐遊青山芳草滿逕生又閱新歲年雲  
飛返層岩魚躍當深淵長松夾幽戶新秫垂高田俯仰  
自無愧笑傲林壑間數卷積案頭一觴倒花前飛飛布  
谷鳥藹藹桑樹烟紅塵絕外想白雪任盈顛貧窮豈不  
念棲遲有餘閑清風北窓來聊復樂自然

村居近南山終日絕蹄鞅幸無形迹拘烟霞愜真想時



尋沮溺翁酌酒共來徃微雨夜來過西疇禾黍長禾黍  
漸已長我懷漸能廣誰謂貴賤殊千秋同草莽

偶影自成酌知音相與稀山深日將夕坐看孤雲歸疎  
柳蔭前除涼風吹我衣衣單亦何恤所恨願多違

和杜工部三韻三首

鹽車病良驥涸轍困長鱗馬病汗流血魚困目有神君  
看忠讜士多為名累身

扶搖大鵬鳥翼若垂長虹直上九萬里寧辭海運功自



非太和風不從南溟中

正士恥多岐衆人貴同調  
相門苟可入拂鬚奉權要  
累金印黃徒詒賢者笑

和韋蘇州寄金椒山中道士

兀坐郡齋裏遠憶黃冠客  
洞口采芝歸羣羊卧白石  
風吟落葉秋雨翳殘鍾  
夕攜酒欲相尋山深斷行迹

和柳柳州贈江華長老

丈室團菁茅禪心湛虛寂  
去歲春陵來蕭然寄高迹  
貝



葉坐翻經篝燈寒照壁萬慮了無營一盃飯昏夕松關  
疎雨鳴竹塢幽泉滴入定起來遲曇花滯身積

和李翰林安陸白兆山桃花畝寄劉侍御綰

白首非少年還山學隱仙時尋羨門子飛珮聲珊珊春  
來桃花畝看雲隨處眠五城非迥絕三島遙勾連閑中  
攀碧蘿直上崑崙巔黃鶴東南來叫破萬里天松絃翠  
濤響泉沫珠顆圓丹光射白日芝草搖晴烟伴鹿坐花  
雨呼龍耕玉田久懷冲舉願永謝塵世緣寄言霜臺客



可以同周旋

題居易齋

人生固有道安命乃其常如何夸毗子磬折趨路旁乞  
墻濫名器怯篋爭攫攘一朝事勢去駢首罹禍殃冰山  
向日頽金谷隨烟荒詰人鑒斯轍正已恒不忘簞瓢豈  
足憂圭組豈足光衰榮無定在通塞任彼蒼開軒坐北  
窓仰睇浮雲翔居然謝塵鞅聊復啜此觴

止言



世方喧利口聒聒了不休聖教貴無言之汝欲何求吾  
觀夸毗子膚險良可羞大易著明訓括囊無怨尤

懷魏冢宰老先生

道學喪已久民心因物遷聖賢不復作病俗何由痊  
名競夸詐學術紛雕鐫坎蛙不知海孰障西流川天生  
魏夫子力任斯道傳知周庶物表心契萬古前文章周  
孔學事業臯夔賢從容出處間名與日月懸青山賦歸  
來白雲當窓眠相思徒仰止日夕東南天



分題得善萬物之得時送蔡大尹還越

東皇載陽和庶類滋以榮萋萋岸草綠的的林花明深  
淵躍潛鱗高樹鳴倉庚江山亦增媚暢彼羣物情吾生  
竟何如乃與憂患并少年學理道將老卒未行拜迎事  
官長鞭朴嗟蒼生才高位不展行峻責愈盈嚶嚶鴈失  
侶逐逐雲孤征便當賦歸去矯首家山青

題九老圖

我聞神仙人往往不易得斯圖繪九老乃類瀛洲客容



顏尚渥丹鬚髮盡垂雪想當香山遊高會總英特安定  
司馬胡馮翊衛尉吉劉鄭宜可肩盧張亦同列就中老  
居士頗憶姓是白平生慕出仕稍稍著勲業一朝服官  
政歸興浩若決復有元爽翁齒數已過百僧人如滿徒  
少日共鄉陌投閑時盍簪氣味迥無別臨流撫鳴琴倚  
杖聽啼鳩長松雨初過草色翠如疊優游竟忘疲聊以  
卒歲月予亦曠達人奔走困仕轍何年預斯會不俟殘  
齒缺願陪衣冠後石澗采薇蕨



題大佛洞

在遂寧縣

平生好幽勝所至窮躋攀今朝銜使命偶此登名山  
縈迴小洞底豁然異塵寰蒙茸竹雲細蕭颯花雨寒  
下有千尺流晝夜聲潺潺巍巍大金山坐鎮石壁間  
歲月知幾何苔蘚生爛斑古今一幻泡等是何足歎  
我來愜清賞又得半日閑振衣起林麓笑逐孤雲還

題夢萱卷

朝望天際雲莫思堂上親子行正無寐惻然傷我神江



湖日以遠親顏不可見回看身上衣空悲手中線昨夢  
到北堂堂前樹萱草秋風忽披拂顏色寧復好覺來坐  
蓬窓憂心耿難忘月明弔孤影涕下霑衣裳

和翰林周先生酬諸君子之作

卓哉衆君子聲利了不干良時足嘉會况乃并二難春  
陽載和煥烟光滴晴戀欣覩羣卉榮豈徒適吟觀  
聖恩曠無際民物皆阜安衣冠樂清暇永此一日歡夫  
何晉人楔增以憂恨端古今信逆旅修短何足歎願言



策吾駕詞藻方波瀾

秋閨詠別

相見更何晚相思良獨悲  
紅顏奉巾帶白髮遺路岐  
別來曾幾何霜露忽淒其  
仰見明月光衆星羅參差  
熠燿已宵飛蟋蟀鳴庭闌  
感之不成寐淚下那可揮  
西風吹羅幕念子寒無時  
豈不盛嬌愛知者當為誰  
願君崇令德努力愛容輝  
棄捐勿復道沉憂令人老

田家雜興 四首



東風扇微和百草萋以綠林間倉鷁鳴正爾春景煥田  
夫喜春到相率殖嘉穀時雨夜來過新苗青簇簇老翁  
負薪回稚子飯黃犢幸逢官府閑近日少徭役努力事  
耕耘毋為餓空谷

步履出東郭南風溪午時偶來松樹下竚立澹忘機野  
老見我至情親語依依桑柔蠶已浴麥深雉初飛俯仰  
玩物理逍遙詠而歸寄謝王良子虛名徒爾為

田家無外求所願營一飽今秋幸少豐處處熟禾稻租



賦輸官倉里胥夜不到張筵會賓朋雞黍雜梨棗相對  
陶一觴頽然玉山倒

茆簷冬日晴懷抱良不惡柴門晝始開雞犬散籬落今  
朝無客至婦子相聚樂牀頭熟新酒聊復共斟酌高歌  
亦自慰焉知死溝壑

思與君別來

思與君別來兩見落葉黃迢迢隔千里各在天一方欲  
往恨無翼欲涉川無梁昔者固膠漆今胡作參商平平



長安道人馬自輝光不念莫逆好虛名竟乖張南箕豈  
堪敲牽牛難服箱憂來不可輟撫膺獨彷徨亮無金石  
心與君永相忘

池上夜坐

池上微雨收涼月吐空谷蕭蕭敗垣柳疎影覆我屋草  
深蛤爭鳴荷折鷺驚宿偶此遂閑情居然忘寵辱

風木卷為蔡教諭題

極目鳳山路松楸暗佳城為問葬者誰蔡氏有先塋西



風吹宰木晝夜號秋聲奈何親久沒悠悠隔平生儒冠  
飽君祿生養不得迎因悲樹欲靜策策風靡寧感之懷  
抱惡有淚如河傾惟餘寒食飯少慰泉下情

舟經湘潭有懷屈賈二子

牽舟西南上所往非一程今日到湘東日出潭水明推  
蓬見青山依依如送行時當長養節好鳥聲和鳴仰視  
天宇闊俯臨川上平薰風颯然至洗我浮世情古人不  
可見所見惟虛名毋為計寵辱頓使此心驚



春暉圖為滇雲萬都閫題

熙熙春日暉綿綿原上草原草含春暉青葱生意好流  
光忽西馳瞬息春已老誰知寸草心懷恩竟難報萬君  
邊閫英所志在忠孝緬思堂上親背棄一何蚤感此春  
暉圖中心怒如擣

和沙木和驛壁間鄭都憲韻

驅馬上林麓陟此崔嵬顛俯視見雲影側聽聞流泉物  
理信堪適人情良不然民貧兵力疲憔悴當誰憐所司



不遑恤剝削方求妍我行適見之喟然嘆窮邊歲月曾  
幾何當不殊往年狐狸安足問祛除欲何先

詠鶴

翩翩青田鶴皜皜玉雪衣一朝養初成奮翼升天衢回  
旋遡寥廓日共鶴鸞嬉虞人挾詐術伺我潛發機我飛  
適中此毛羽半摧頽倉皇墮山澤鴈鶩每見欺天寒稻  
梁少歲晚恒苦饑偶因條風發載我西南隅西南萬里  
外道梗儔侶稀蟲魚豈不足所恨非故棲延頸望雲路



肅羽何時歸

自曲靖回至楊林觀田家刈穫有成

輜車至楊林秋日正卓午時維九月候穰稔滿滇土田  
家急收穫處處築場圃甌窶亦滿溝牛載更兒負筋力  
誠乃疲腰背若偃僂所願在有秋不復辭此苦寧知輸  
官倉所得遺幾許貧家計口食歲暮復貸舉因思井田  
制百畝什一取是時人足食狼戾厭禾稌呼醵擊肥鮮含  
哺醉起舞此樂不復見使我熱衷腑所冀良有司善政



去苛虎捍吏不打門瘡孔或少補作詩告民牧殷勤為  
摩撫

擬阮嗣宗詠歌一首

掩書坐前楹獨對一尊酒春風吹柳花漂泊入虛牖喧  
喧名利場能有此樂否人生不得意胡為事奔走昨朝  
美少年今日成老醜自非松栢姿安能無白首

村田樂圖為內相素軒錢公題

昔在唐虞世俗善民相親八家實同井耕收力惟均是



時村田間民質如游麋擊壤有餘樂含哺無嘖呻孰知  
世日降三代變狂秦經界不復正強暴相并吞干戈事  
行役饑寒多苦辛遂令百代下風俗難回淳政苛若猛  
虎郡邑成墟榛操瓢轉溝塹哀痛聲忍聞何人貌此圖  
彷彿康衢民惟應文景際海內咸富殷陳陳太倉粟紅  
腐每相因後來貞觀治用意亦良勤斗米僅三錢路無  
拾遺貧悠悠千百載兩見造化仁奈何治日少倍克殊  
紛紜青苗任新法石貢陰濱吾民當此時何異魚在



綸大明富九有萬姓逢昌辰况茲邊徼任乃屬心腹臣  
撫摩猶赤子恩愛同陽春四郊盡樂土遠近無烟塵年  
年二月候村村花柳新居民作春社雞酒聚比隣吹竽  
復考鼓起舞仍蹲蹲歡呼奔老稚來往襍蹄輪信知仁  
政下巨壑無枯鱗古云一日澤此意猶能存我歌村田  
詩再見豳風陳

觀內相素軒錢公射鳥因賦鄙韻用呈

勝日良讌會逍遙雲水鄉佳賓列四座繁吹促飛觴時



維秋序晚穠稔垂田疆覩茲農事成歡樂殊未央高柳  
陰虛亭殘荷薦餘香有鳥類山雀枝上止且鳴叶左右  
紛射之烏號竟虛張公起挾一矢疾發如流星叶翩然  
中修尾遠墮池水旁衆賓競稱賞此巧奪穿楊方今西  
北境獫狁來狂勦安得我公輩強弓用其長一箭退勍  
敵摧北如驅狼坐令四海間至治成虞唐

素行齋為曹司訓以寧賦

至人貴素行而豈外物慕儒冠三十秋曾不殊布素臆



前貯古書日夕誦且悟臯比坐談道正聲起韶濩時時  
綴文章下筆騁遷固諸生日樞趨藹藹揖風度蘇湖百  
載餘今復見矩步杏壇春日晴絃歌有深趣視彼富貴  
榮何如草間瓠不學夸毗子磬折趨末路

哭姊

我年十五時不幸失所怙私門禍繫纏母亦尋見負哀  
哀抱深戚耿耿心欲腐是時姊甫笄已作張氏婦念我  
同胞親恩愛每相顧我喘獲苟存見姊如見母竭來歲



月遷中外叨仕膺骨肉久離別相望異鄉土時時得姊  
書頗似顏面親行當謀掛冠為姊粥親煮奈何王事縻  
山川日乖阻因思昔別時河橋日將午姊送不忍歸恐  
我難再晤昨朝家書來豈意遽傳訃彼蒼胡不仁生死竟  
殊路初聞若遇刃痛楚徹心腑食梅孰云酸嚼蘖孰云  
苦冤哉但長號臨風淚如雨

清風亭稿卷三